

L I G J
Nr. 8167, datë 21.11.1996

PËR SHËRBIMIN SHËNDETËSOR STOMATOLOGJIK
(Ndryshuar me ligjet: nr. 8414, datë 1.10.1998; nr. 9153, datë 6.11.2003)

(i përditësuar)

Në mbështetje të nenit 16 të ligjit nr. 7491, datë 29.4.1991 “Për dispozitat kryesore kushtetuese”, me propozimin e Këshillit të Ministrave,

KUVENDI POPULLOR
I REPUBLIKËS SË SHQIPËRISË

V E N D O S I:

KREU I
DISPOZITA TË PËRGJITHSHME

Neni 1

Ky ligj rregullon organizimin, funksionimin dhe veprimtarinë në fushën e shërbimit shëndetësor stomatologjik, privat dhe publik.

Neni 2

Ministria e Shëndetësisë përcakton strategjinë e zhvillimit të shërbimit stomatologjik, mënyrën e organizimit, normat dhe rregulloret e funksionimit të tyre dhe për sektorin publik formën e shërbimeve si dhe strukturat e institucioneve.

Neni 3

(Ndryshuar me ligjin nr. 8414, datë 1.10.1998)

Shërbimi shëndetësor stomatologjik, profilaktik dhe mjekues mbulohet nga buxheti i shtetit:

1. Plotësisht:
 - a) për moshat nën 18 vjeç;
 - b) për të shtruarit dhe për ata që trajtohen në institucionet spitalore, shtetërore, për rastet e mjekimeve urgjente;
 - c) për kategori individësh, të përcaktuara në dispozita ligjore;
 - ç) për shërbimin e urgjencave stomatologjike, për moshat mbi 18 vjeç, sipas përcaktimeve të bëra nga Ministria e Shëndetësisë;
 - d) për trajtime mjekësore stomatologjike, në terapi dhe kirurgji, në departamentin e stomatologjisë së Fakultetit të Mjekësisë.
2. Pjesërisht, me tarifa të përcaktuara nga Ministria e Shëndetësisë dhe të miratuara nga Ministria e Financave:
 - a) për shërbime stomatologjike, ortopedike në departamentin e stomatologjisë së Fakultetit të Mjekësisë;
 - b) për shërbime stomatologjike në institucionet shtetërore, pa subvencion nga shteti ose me drejtim ekonomik.

Neni 4

Ministria e Shëndetësisë, në bashkëpunim me Ministrinë e Arsimit dhe Shkencës, përcaktojnë rregulloret përkatëse për shërbimet shëndetësore stomatologjike në institucionet shkollore.

Ministria e Shëndetësisë detyrohet të sigurojë inventarin, materialet e konsumit të nevojshëm për kryerjen e këtij shërbimi si dhe mbajtjen në gadishmëri të këtij inventari.

Ministria e Arsimit dhe Shkencës detyrohet të sigurojë mjediset e kushtet e nevojshme të përshtatshme për shërbimin stomatologjik.

Neni 5

Organet qendrore të administratës shtetërore dhe ato të pushtetit lokal, shoqatat dhe fondacionet mund të organizojnë shërbimin shëndetësor stomatologjik për kategori të caktuar individësh me buxhetin e tyre.

INSTITUCIONET SHËNDETËSORE STOMATOLOGJIKE, ORGANIZIMI DHE FUNKSIONIMI I TYRE

Neni 6

Në institucionet shëndetësore stomatologjike përfshihen:

- Institucionet stomatologjike publike
- Institucionet stomatologjike private

Neni 7

Institucionet shëndetësore stomatologjike private hapen me kërkesën e personave juridikë dhe fizikë vendas e të huaj, duke u bazuar në kushtet dhe kriteret e përcaktuara nga Ministria e Shëndetësisë.

Neni 8

Institucionet shëndetësore spitalore, plotësimin e nevojave me shërbim stomatologjik (si me specialistë e ndihmës-specialistë stomatologë etj.) e realizojnë si rregull me subjekte private sipas çmimeve të përcaktuara në kontratat e shërbimeve ose nëpërmjet shërbimit shëndetësor stomatologjik shtetëror.

KREU III TË DREJTAT PËR USHTRIMIN E PROFESIONIT

Neni 9

Të drejtën për ushtrimin e profesionit në fushën e stomatologjisë e kanë personat juridikë e fizikë vendas e të huaj.

Neni 10

(Shtuar shkronja "ç" me ligjin nr. 9153, datë 6.11.2003)

Personat juridikë dhe fizikë vendas e të huaj janë të detyruar të pajisen me licencë profesionale, të lëshuar nga Ministria e Shëndetësisë:

- a) për ushtrimin e veprimtarisë private në fushën e stomatologjisë;
- b) për hapjen e institucioneve stomatologjike private (në trajtën e klinikave komplekse dentare);
- c) për tregtimin e materialeve dhe aparaturave dentare.
- ç) për kualifikimin e specializimin e specialistëve të mesëm e të lartë dhe për hapjen e shkollave profesionale që përgatisin specialistë të fushës së stomatologjisë, sipas legjislacionit për arsimin dhe formimin profesional.

Neni 10/1

(Shtuar me ligjin nr. 9153, datë 6.11.2003)

Personat juridikë dhe fizikë, vendas e të huaj, që janë të pajisur me licencë profesionale, sipas shkronjës “c” të nenit 10 të këtij ligji, për çdo importim të bërë, pajisen me leje importi për materiale dhe aparatura dentare nga Ministria e Shëndetësisë. Licenca e importit është automatike.

Ministri miraton rregulloren përkatëse.

Neni 11

(Ndryshuar me ligjin nr. 8414, datë 1.10.1998; ndryshuar me ligjin nr. 9153, datë 6.11.2003)

Shërbimi shëndetësor stomatologjik, publik dhe privat, kontrollohet nga Inspektorati Stomatologjik Shtetëror.

Neni 12

(Ndryshuar me ligjin nr. 8414, datë 1.10.1998)

Veprimtaria profilaktike, mjekuese dhe diagnostikuese ortodontike dhe procesi diagnostikues në institucionet stomatologjike publike kryhet nga mjekët stomatologë dhe asistentët përkatës.

Neni 13

Të drejtën për t’u pajisur me licencë për ushtrimin e profesionit pa praninë e mjekut e gëzojnë ndihmësmjekët stomatologë me arsimin e mesëm profesional, kur kanë punuar me pacientë si asistentë të mjekut mbi 10 vjet.

Neni 14

Laborantet e shërbimit të ortopedisë gëzojnë të drejtën e pajisjes me licencë për ushtrimin e profesionit si laborant dentar. Laborantët dentarë nuk u lejohet të kryejnë veprimtari mjekuese me pacientë.

KREU III/1

STRUKTURAT E KONTROLLIT TË SHËRBIMIT STOMATOLOGJIK

(Shtuar Kreu III/1 me ligjin nr. 9153, datë 6.11.2003)

Neni 14/1
(Shtuar me ligjin nr. 9153, datë 6.11.2003)

Në varësi të Ministrit të Shëndetësisë krijohet Inspektorati Stomatologjik Shtetëror, si organi më i lartë i kontrollit stomatologjik. Struktura, rregullat e funksionimit të Inspektoratit Stomatologjik Shtetëror, në nivel qendror dhe vendor, miratohen nga Ministri i Shëndetësisë.

Neni 14/2
(Shtuar me ligjin nr. 9153, datë 6.11.2003)

Inspektorati Stomatologjik Shtetëror është organi ekzekutiv i specializuar, që kontrollon zbatimin e këtij ligji dhe të akteve nënligjore në shërbimin stomatologjik publik dhe privat.

Neni 14/3
(Shtuar me ligjin nr. 9153, datë 6.11.2003)

Inspektorati Stomatologjik Shtetëror, në kryerjen e detyrave të tij, bashkëpunon me:
Inspektoratin Sanitar Shtetëror;
Inspektoratin Epidemiologjik;
Komisionin e Mbrojtjes nga Rrezatimet.
Koordinimi i punës së këtyre organeve bëhet me urdhër të Ministrit të Shëndetësisë.

KREU IV
SPECIALIZIMI DHE KUALIFIKIMI I PUNONJËSVE TË SHËRBIMIT
STOMATOLOGJIK

Neni 15

Departamenti i Stomatologjisë në Fakultetin e Mjekësisë është institucioni që përgatit specialistët e lartë të profileve të stomatologjisë.

Neni 16

Të drejtën e kualifikimit dhe të specializimit të specialistëve të mesëm e të lartë e kanë edhe personat juridikë, kur plotësojnë kushtet e përcaktuara dhe me autorizim nga Ministria e Shëndetësisë dhe nga Ministria e Arsimit dhe Shkencës.

KREU V
DISPOZITA TË FUNDIT

Neni 17

Punonjësit e shërbimit stomatologjik janë të detyruar të afishojnë çmimet dhe shërbimet që ata ofrojnë.

Neni 18

Mjekët stomatologë privatë janë të lirë të bëjnë reklamë personale, e cila duhet të jetë legale dhe e vërtetë, për të përcjellë mesazhe të ndryshme për tipat e trajtimit, specializimit dhe kualifikimet.

Neni 19
(Ndryshuar me ligjin nr. 8414, datë 1.10.1998)

Shkeljet e rregullave të parashikuara në nenet 3, 4, 8, 10, 14 dhe 17 të këtij ligji, kur nuk formojnë vepër penale, përbëjnë kundërvajtje administrative dhe dënohen nga organet e përcaktuara në nenin 11 të këtij ligji, si më poshtë:

a) Për ushtrim profesioni pa licencë në fushën e stomatologjisë, me gjobë nga 10 000 deri në 50 000 lekë dhe në rast mospajisjeje me licencë brenda një afati 2 mujor, me pezullimin e veprimtarisë dhe deri në mbylljen e klinikës.

b) Për hapjen e institucioneve shëndetësore stomatologjike private pa licencë, me gjobë nga 50 000 deri në 100 000 lekë dhe në rast mospajisjeje me licencë, brenda një afati 2 mujor, me pezullimin e veprimtarisë dhe deri në mbylljen e institucionit.

c) Për mosrealizimin e kushteve të nevojshme për ushtrimin e shërbimit stomatologjik në institucionet shkollore, me gjobë nga 10 000 deri në 20 000 lekë, deri në pezullimin e veprimtarisë.

ç) Për mosafishimin e çmimeve të shërbimit, me gjobë nga 1 000 deri në 5 000 lekë.

d) Për mosrealizimin e shërbimit stomatologjik për moshat nën 18 vjeç, të të shtruarve në spitale, të kategorive të përcaktuar në dispozitat ligjore dhe urgjencat për të rritur, me gjobë nga 10 000 deri në 50 000 lekë.

dh) Për mospërmblidhjen e detyrimeve ndaj kontratës së lidhur ndërmjet palëve për realizimin e shërbimit, me gjobë nga 10 000 deri në 50 000 lekë ose me heqjen e licencës.

e) Për ushtrimin e veprimtarisë mjekuese me pacientë nga laborantët dentarë, me gjobë nga 10 000 deri 50 000 lekë ose me heqjen e licencës.

Neni 20

Shqyrtimi i kundërvajtjes administrative të parashikuar në dispozitat e mësipërme bëhet sipas ligjit nr. 7679, datë 7.4.1993 "Për kundërvajtjet administrative", me ndryshimet përkatëse.

Neni 21

Ministria e Shëndetësisë, Ministria e Arsimit dhe e Shkencës përgatisin dhe miratojnë aktet nënligjore në zbatim të këtij ligji.

Neni 22

Të gjithë dispozitat që bien në kundërshtim me këtë ligj, shfuqizohen.

Neni 23

Ky ligj hyn në fuqi 15 ditë pas botimit në Fletoren Zyrtare.

**Shpallur me dekretin nr. 1661, datë 5.12.1996 të Presidentit të Republikës së Shqipërisë,
Sali Berisha**